

四庫全書

史部

欽定四庫全書

明史卷二百三十七

大學士張廷玉等奉敕修

列傳第一百二十五

傅好禮

姜志禮

包見捷

田大益

馮應京

何棟如
卞孔時

王之翰

吳宗堯

吳寶秀

華鉅

王正志

傅好禮字伯恭固安人萬歷二年進士知涇縣治最入
為御史嘗陳時政請節游宴停內操罷外戚世封止山
陵行幸又上崇實杜漸諸疏語皆剴直巡按浙江歲大
侵條上荒政行部湖州用便宜發漕折銀萬兩易粟振
饑民改按山東泰安州同知張壽朋當貶秩文選郎謝
廷寀用為永平推官謂州同知六品而推官七品也好
禮馳疏劾其非制廷寀坐停俸壽朋改調好禮尋謝病
歸召進光祿少卿改太常時稅使四出海內騷然二十

六年冬奸民張禮等偽為官吏羣小百十人分據近京要地稅民間雜物弗予捶至死好禮極論其害因言自朝鮮用兵畿民富者貧貧者死思亂已久奈何又虐征國家縱貧亦不當頭會箕斂括細民續命之脂膏况奸徒所得千萬輸朝廷者什一耳陛下何利為之奏入四日未報復具疏請帝大怒傳旨鐫三級出之外大理卿吳定疏救帝益怒謫好禮大同廣昌典史定鐫三級調邊方言官復交章論救斥定為民既而帝思好禮言下

其疏命殿衛嚴緝逮禮等二十八人詔獄其害乃除好
禮之官未幾請急歸家居十五年卒天啟中贈太常卿
姜志禮字立之丹陽人萬曆十七年進士歷建昌衢州
推官入為大理評事三十三年以囚多瘐死疏言犴狴
之間一日斃十五人積日而計亦何紀極又況海內小
民罹災祲而轉死溝壑及為礦稅所羅織貂璫所攫噬
含冤畢命者又復何限乞亟為矜宥勿久淹繫且盡除
礦稅毋使宵人竊弄魁柄賊害烝黎不報歷刑部員外

出為泉州知府遷廣東副使並有聲進山東右參政分
守登萊福王封國河南詔賜田二百萬畝跨山東湖廣
境既之國遣中官徐進督山東賦勢甚張志禮抗疏曰
臣所轄二郡民不聊生且與倭鄰不宜有藩府莊田以
擾茲土也明甚且自高皇帝迄今累十餘世封王子弟
多矣有賜田二萬頃延連數十郡者乎繼此而封尚有
瑞惠桂三王也倘比例以請將予之乎不予之乎況國
祚靈長久且未艾嗣是天家子孫各援今日故事以請

臣恐方內土田不足共諸藩分裂也帝大怒貶三秩為
廣西僉事久之遷江西參議天啟三年由浙江副使入
為尚寶少卿尋進卿河南進玉璽魏忠賢欲志禮疏獻
之志禮不可忠賢怒令私人劾其衰老遂乞休詔加太
常少卿致仕已而削奪崇禎初復官志禮性淳樸所居
多政績亦以行誼稱於鄉

包見捷雲南臨安衛人萬曆十七年進士改庶吉士授
戶科給事中屢遷都給事中奸人李本立請採珠廣東

帝命中官李敬偕往見捷極言其害不聽時小人蠶起
言利千戶李仁請稅湖口商舟命中官李道往主簿田
應璧請賣兩淮沒官餘鹽令稅使魯保兼理見捷等並
力爭頃之令道保節制有司見捷又陳不便者數事皆
不報益都知縣吳宗堯劾稅使陳增不法見捷因請盡
罷礦稅無已先撤增還未幾天津稅使王朝死見捷請
勿遣代忤旨切責以馬堂代朝見捷又劾堂保及浙江
劉忠帝不納益遣高寀暨祿李鳳權稅於京口儀真廣

東並專敕行事又以奸人閻大經言命高淮徵稅遼東見捷等累請停罷至是言遼左神京肩臂視他鎮尤重奸徒敢為禍首陛下不懲以三尺急罷開採則遼事必不可為而國步且隨之矣遼東撫按及山海主事吳鍾英相繼爭皆不納時中外爭礦稅者無慮百十疏見捷言尤數帝心銜之居數日又率司官極論乃謫見捷貴州布政司都事餘停俸一年大學士沈一貫給事中張完璧等先後論救完璧等亦坐停俸見捷等尋疾去三

十四年起興業知縣累遷太僕少卿久之以右僉都御史巡撫江西光宗即位召拜吏部右侍郎明年卒官

田大益字博真四川定遠人萬曆十四年進士授鍾祥知縣擢兵科給事中疏論日本封貢可虞又言東征之役在將士則當據今日之斬馘以論功在主帥則當視後日之成敗以定議時躋其言母喪除起補戶科二十八年十月疏言陛下受命日久驕泰乘之布列豺狼殄滅善類民無所措靡不蓄怨含憤覬一旦有事願陛下

惕然警覺敬天地嚴祖宗毋輕臣工毋戕民命毋任閹
人毋縱羣小毋務暴刻毋甘怠荒急改敗轍遵治規用
保祖宗無疆之業未幾極陳礦稅六害言內臣務為劫
奪以應上求礦不必穴而稅不必商民間邱隴阡陌皆
礦也官吏農工皆入稅之人也公私騷然脂膏殫竭向
所謂軍國正供反致缺損即令有司威以刀鋸祇足驅
民而速之亂耳此所謂斂功必蹶也陛下嘗以礦稅之
役為裕國愛民然內庫日進不已未嘗少佐軍國之需

四海之人方反唇切齒而冀以計智甘言掩天下耳目
其可得乎此所謂名爲必敗也財積而不用崇將隨之
脫巾不已至於揭竿適爲奸雄睥睨之資此時雖家給人
予亦且蹴之覆之而不可及矣此所謂賄聚必散也
夫衆心不可傷也今天下上自簪纓下至耕夫賤婦茹
苦含辛撻擊側目而無所控訴者蓋已久矣一旦土崩
勢成家爲讐人爲敵衆心齊倡而海內因以大潰此所
謂怨極必亂也國家全盛二百三十餘年已屬陽九而

東征西討以求快意上之蕩主心下之耗國脈二豎固
而良醫走死氣索而大命傾此所謂禍遲必大也陛下
矜奮自賢沈迷不返以豪璫奸弁為腹心以金錢珠玉
為命脈藥石之言褻如充耳即今逢干剖心臯夔進諫
亦能解其惑哉此所謂意迷難救也此六者今之大
患臣畏死不言則負陛下陛下拒諫不納則危宗社願
深察而力反之皆不報明年疏論湖廣稅監陳奉救僉
事馮應京忤旨切責時武昌民以應京被逮羣聚鼓譟

欲殺奉奉逃匿楚府以免大益因上言陛下驅率狼虎
飛而食人使天下之人剝膚而吸髓重足而累息以致
天災地坼山崩川竭釁自上開憤由怨積奈何欲塗民
耳目以自解釋謾曰權宜哉今楚人以奉故沈使者不
返矣且欲甘心巡撫大臣矣中朝使臣不敢入境偵緩
急踰兩月矣四方觀聽惟在楚人臣意陛下必且曠然
易慮立罷礦稅以靖四方奈何猶戀戀不能自割也夫
天下至貴而金玉珠寶至賤也積金玉珠寶若泰山不

可市天下尺寸地而失天下又何用金玉珠寶為哉今
四方萬姓見陛下遇楚事而無變志知禍必不解必且
羣起為變此時即盡戮諸璫以謝天下寧有濟耶帝怒
留中又明年遷兵科都給事中時兩京缺尚書三侍郎
十科道九十四天下缺巡撫三布按監司六十六知府
二十五大益力請簡補亦不聽三十一年江西稅監潘
相請勘合符牒勿經郵傳巡按御史吳達可駁之不聽
大益復守故事力爭竟如相請因使王朝嘗言近京采

煤歲可獲銀五千乃率京營兵劫掠西山諸處煤戶洵
洵朝以阻撓聞有旨逮治皆入都城訴失業狀沈一貫
等急請罷朝且擬敕諭撫按未得命大益言國家大柄
莫重於兵朝擅役禁軍請急誅為無將之戒御史沈正
隆給事中楊應文白瑜亦疏諫帝俱不納俄用中官陳
永壽奏乃召朝還遼東稅監高淮擁精騎數百至都城
大益言祖制人臣不得弄兵淮本歸掃除之役盜兵權
包禍心罪當誅帝亦不問明年八月極陳君德缺失言

陛下專志財利自私藏外絕不措意中外羣工因而泄
泄君臣上下曾無一念及民空言相蒙人怨天怒妖祲
變異罔不畢集乃至皇陵為發祥之祖而災孝陵為創
業之祖而災長陵為奠鼎之祖而亦災天欲蹶我國家
章章明矣臣觀十餘年來亂政亟行不可枚舉而病源
止在貨利一念今聖諭補缺官矣釋繫囚矣然礦稅不
撤而羣小猶恣橫閭閻猶朘削則百工之展布實難而
罪罟之羅織必衆缺官雖補繫囚雖釋曾何益哉陛下

中歲以來所以掩聰明之質而甘蹈貪愚暴亂之行者止為家計耳不知家之盈者國必喪如夏桀隕於瑤臺商紂焚於寶玉幽厲啟戎於榮夷桓靈絕統於私鬻德宗召難於瓊林道君兆禍於花石覆轍相仍昭然可鑒陛下邇來亂政不減六代之季一旦變生其何以託身於天下哉居月餘復以星變乞固根本設防禦罷礦稅帝皆不省又明年以久次添注太常少卿卒官大益性骨鯁守官無他營數進危言卒獲免禍蓋時帝倦勤上

章者雖千萬言大率屏置弗閱故也

馮應京字可大盱眙人萬曆二十年進士為戶部主事督薊鎮軍儲以廉幹聞尋改兵部進員外郎二十八年擢湖廣僉事分巡武昌漢陽黃州三府繩貪墨摧奸豪風采大著稅監陳奉恣橫巡撫支可大以下唯諾惟謹應京獨以法裁之奉培克萬端至伐塚毀屋剗孕婦溺嬰兒其年十二月有諸生妻被辱訴上官市民從者萬餘哭聲動地蠶涌入奉廨諸司馳救乃免應京捕治其

爪牙奉怒陽餉食而置金其中應京復暴之益慚恨明年正月置酒邀諸司以甲士千人自衛遂舉火箭焚民居民羣擁奉門奉遣人擊之多死碎其屍擲諸途可大喋不敢出聲應京獨抗疏列其九大罪奉亦誣奏應京撓命凌敕使帝怒命貶雜職調邊方給事中田大益御史李以唐等交章劾奉乞宥應京帝益怒除應京名是時襄陽通判卽宅推官何棟如棗陽縣知縣王之翰亦忤奉被劾詔宅之翰為民棟如遣逮俄以都給事中楊

應文論救遂并逮應京宅之翰三人頃之奉又誣劾武昌同知卞孔時抗拒孔時亦被逮緹騎抵武昌民知應京獲重譴相率痛哭奉乃大書應京名列其罪榜之通衢士民益憤聚數萬人圍奉廨奉窘逃匿楚王府遂執其爪牙六人投之江并傷緹騎詈可大助虐焚其府門可大不敢出奉潛遣參隨三百人引兵追逐射殺數人傷者不可勝計日已晡猶紛拏應京囚服坐檻車曉以大義乃稍稍解散奉匿楚府逾月不敢出亟請還京大

學士沈一貫因極言奉罪請立代還言官亦爭以為請
帝未許俄江西稅監李道亦奏奉侵匿狀乃召還隸其
事於承天守備杜茂頃之東廠奏緹騎有死者帝愠甚
手詔內閣欲究主謀一貫言民心宜靜請急遣重臣代
可大拊循因以侍郎趙可懷薦帝乃褫可大官令可懷
馳往未至可大已遣兵護奉行舟車相銜數里不絕可
懷入境亦遣使護之奉得迤邐去應京之就逮也士民
擁檻車號哭車不得行既去則家為位祀之三郡父老

相率詣闕訴寃帝不省吏科都給事中郭如星刑科給事中陳維春更連章劾奉帝怒謫兩人邊方雜職繫應京等詔獄拷訊久之不釋應京乃於獄中著書昕夕無倦三十二年九月星變修省廷臣多請釋繫囚於是應京及宅棟如獲釋之翰先瘞死而孔時繫獄如故應京志操卓犖學求有用不事空言為淮西士人之冠出獄三年卒天啟初贈太常少卿謚恭節何棟如無錫人居官守正既為奉所陷襄陽人赴闕訴寃不聽及出獄削

籍歸家居十七年天啟初始起南京兵部主事會遼陽陷時議募兵棟如自請行遂齎帑金赴浙江得六千七百人甫至而廣寧復陷又自請出關視形勢乃進太僕少卿充軍前贊畫棟如志銳而才踈初在浙不能無浮費所募兵畏出關多逃亡及兩疏論熊廷弼王化貞功罪給事中蔡思充朱童蒙御史陳保泰遂交章劾之棟如疏辨因請非時考察京官用親朋黨朝貴大恨遂下詔獄榜掠備至五年秋坐贓戍滁州崇禎初復官致仕

卒王之翰絳州人官棗陽力阻開礦遂被逮拷死天啟
初贈光祿少卿孔時既長繫廷臣救者數十上帝皆不
省四十一年萬壽節葉向高復以為言乃削籍放還熹
宗立起南京刑部員外郎

吳宗堯字仁叔歙縣人萬曆二十三年進士授益都知
縣性強項中官陳增以開礦至誣奏福山知縣韋國賢
阻撓被逮削籍守令多屈節如屬吏宗堯獨具賓主禮
增黨程守訓宗堯邑子也宗堯惡其奸不與通驛丞金

子登說增開孟坵山礦宗堯叱其欺罔子登懼搆於增
日徵千人鑿山多挫死又誣富民盜礦三日捕繫五百
人二十六年九月宗堯盡發增不法事帝得疏意動持
不下會給事中包見捷極論增罪請撤還帝責增令檢
下見捷同官郝敬復請治增罪帝乃不悅責宗堯狂逞
要名已而山東巡撫尹應元劾增背旨虐民二十罪帝
遂發怒切責應元削宗堯籍敬復抗疏諫帝益怒奪俸
一年并奪應元俸增遂劾宗堯阻撓礦務且令守訓誣

訐之帝既遣逮治御史劉景辰給事中侯慶遠爭之不聽使者至民大譁欲殺增宗堯行民哭聲震地既至下詔獄拷訊繫經年禮部郎鮑應鰲等言於沈一貫曰南康守吳寶秀已得安居牖下宗堯何獨不然一貫揭入即釋為民未幾卒天啟時贈光祿少卿賜祭錄一子

吳寶秀字汝珍平陽人萬曆十七年進士授大理評事歷寺正出為南康知府湖口稅監李道橫甚寶秀不與通漕舟南還乘風揚帆入湖口道欲權其貨遣卒急追

之舟覆有死者道遣吏捕漕卒寶秀拒不發道怒劾寶秀及星子知縣吳一元青山巡檢程資阻撓稅務詔俱逮治給事中楊應文等請下撫按公勘大學士沈一貫吏部尚書李戴國子祭酒方從哲等交章為言俱不報寶秀妻陳氏慟哭請偕行寶秀不可乃括餘貲及簪珥付其妾曰夫子行以為路費夜自經死寶秀至京下詔獄大學士趙志臯上言頃臣臥病聞中外人情洶洶皆為礦稅一事南康守吳寶秀逮繫時其妻至投繯自盡

闔郡號呼幾成變亂事關民生向背宗社安危臣不敢以將去之身隱默而不言星子民陳英者方廬墓約儒士熊應鳳等走京師伏闕訟冤乞以身代於是撫按及南北諸臣論救者疏十餘上帝皆不省一日司禮田義彙諸疏進御前帝怒擲地義從容拾起復進之叩首曰閣臣跪候朝門外不奉處分不敢退帝怒稍平取閱閣臣疏命移獄刑部皇太后亦聞陳氏之死從容為帝言至九月與一元等並釋為民歸家踰年卒初南康士民

建祠特祀陳氏後合寶秀祀之天啟中贈太僕少卿賜祭錄其一子

華鈺字德夫丹徒人萬曆二十三年進士授荊州推官稅監陳奉僕直馳府署中鈺笞之奉佯謝銜之刺骨奉所受敕止江稅乃故移之市又倍蓰征之稍與辨輒毆擊破面商賈怖匿負擔者不敢出其途鈺白御史嚴戢奉益恨奉欲權沙市稅沙市人羣起逐之奉疑鈺所使已欲權黃州團風鎮稅復為鎮民所逐奉又疑經歷車

重任教之遂上疏極論鈺重任阻撓罪并及巡按御史曹楷襄陽知府李商耕黃州知府趙文煥荊門知州高則巽等數十人帝切責楷貶商耕等三人官鈺重任皆被逮時二十七年八月也既至下鎮撫獄訊治俾引御史楷鈺堅不承繫獄中初吳宗堯吳寶秀皆不久即釋帝欲痛折辱以懼之於是鈺與馮應京王正志等先後十餘人悉長繫廷臣論救章數上皆不報獄中有鳥形類鶴而小怪鳴則逮者至一夕鳥鳴甚哀鈺起坐俟之

則應京至居久之語鈺以主靜窮理之學日相與妍究
三十二年六月長陵災肆赦鈺與重任並釋為民家居
四年卒天啟中贈尚寶少卿賜祭錄一子王正志祥符
人萬厯二十六年進士除富平知縣二十八年稅使梁
永趙欽肆虐正志捕其黨李英杖殺之因極論二人不
法罪欽亦以李英事訐奏帝怒命逮之給事中陳惟春
言正志劾欽罪多宜提訊欽所劾正志事宜下撫按覈
實免其逮繫御史李時華亦言近日所逮吳應鴻勞養

魁蔡如川甘學書及正志等俱宜敕下撫按勘虛實不
得以一人單詞枉害良善皆不報未幾梁永亦訐正志
帝命諸抗違欺隱者悉指名劾奏重治之宦官益張長
吏皆喪氣正志繫詔獄四年三十一年夏瘦死天啟時
贈祭廕子皆脉鉦自礦稅興中使四出貽藉有司謗書
一聞駕帖立下二十四年則遼東參將梁心二十五年
則山東福山知縣韋國賢二十六年則山東益都知縣
吳宗堯二十七年則江西南康知府吳寶秀星子知縣

吳一元山東臨清守備王煬二十八年則廣東新會在籍通判吳應鴻舉人勞養魁鍾聲朝梁斗輝雲南尋甸知府蔡如川趙州知州甘學書及正志二十九年則湖廣按察僉事馮應京襄陽通判邸宅推官何棟如棗陽知縣王之翰武昌同知卞孔時江西饒州通判陳奇可三十年則鳳陽臨淮知縣林鏞三十四年則陝西咸陽知縣宗時際三十五年則陝西咸寧知縣滿朝薦三十七年則遼東海防同知王邦才參將李獲陽皆幽繫詔

獄久者至十餘年煬應鴻獲陽斃獄中其他削籍貶官有差至士民幽繫死亡者尤不可勝紀也

贊曰神宗二十四年軍府千戶仲春請開礦助大工遂命戶部錦衣官各一人同仲春開採給事中程紹言嘉靖中採礦費帑金三萬餘得礦銀二萬八千五百得不償失因罷其役給事中楊應文繼言之皆不納由是卑秩冗僚下至市井黠桀奮起言利而璫使四出毒流海內民不聊生至三十三年乃罷嗣是軍興徵發加派再

三府庫未充膏脂已竭明室之亡於此是決矣



明史卷二百三十七

欽定四庫全書

明史卷二百三十七考證

包見捷傳見捷言尤數

臣嚴福按紀事本末見捷疏

論礦店滋蔓又疏論臨清稅使擾民必致生變又論
遼左阡危礦市為患尤烈一月三疏指數內監最為
切直謹附考

馮應京傳奉又誣劾武昌同知卞孔時抗拒孔時亦被
逮臣嚴福按武昌同知卞孔時被逮時知府王禹

聲亦謫為民禹聲著郢事紀畧備列奉激變之由見

本傳謹附考

馮應京傳遂執其爪牙六人投之江

臣嚴福按宦官

傳作十六人與此互異謹識

吳寶秀傳授大理評事厯寺正出為南康知府

臣嚴

福按紀事本末寶秀在大理廉平有聲其之南康任也纔十有六日謹附考

華鈺傳車任重

臣

嚴福按車重任宦官傳作車任重

與此互異謹識

宗時際

臣

嚴福按宗時際宦官傳宗作宋與此互異

謹識

李獲陽

臣

嚴福按李獲陽宦官傳作李孟陽與此互

異謹識

明史卷二百三十七考證

欽定四庫全書

史部

明史卷二百三十八至
四十

給事中_臣劉湄覆勘

總校官編修_臣朱鈴

欽定四庫全書

明史卷一百三十八

大學士張廷玉等奉 敕修

列傳第一百二十六

李成梁

字如梓 如柏 如楨
如樟 如梅 如楨

麻貴

兄 錦壽

李成梁字汝契高祖英自朝鮮內附授世鐵嶺衛指揮
命事遂家焉成梁英毅驍健有大將才家貧不能襲職

年四十猶為諸生巡按御史器之資入京乃得龔積功為遼東險山參將隆慶元年土默特入永平成梁赴援有功進副總兵仍守險山尋協守遼陽三年四月張巴克什等屯塞下成梁擊斬之殲其卒百六十有奇餘衆遠徙遂空其地錄功進秩一等四年九月錫林阿大入遼東總兵王治道戰死擢成梁署都督僉事代之時諳達雖款塞而察罕部長土默特與從父哈斯坦弟衛徵大衛徵從弟努圖克恭圖子布延台吉從子黃台吉勢

方強泰寧部長蘇巴爾噶綽哈朵顏部長董呼哩長安
佐之東則王杲王烏塔青噶諾爾楊珠諾爾之屬亦時
窺塞下十年之間殷尚質楊照王治道皆戰死成梁乃
大修戎備甄拔將校收召四方健兒給以厚餼用為選
鋒軍聲始振明年五月敵犯盤山驛指揮蘇成勛擊走
之無何土默特入成梁遇於卓山麾副將趙完等夾擊
斷其首尾乘服抵巢馘部長二人斬首五百八十餘級
進署都督同知世廕千戶又明年十月土默特六百騎營

舊遼陽北河去邊二百餘里俟衆集大舉成梁擊走之
萬厯元年又擊走之前屯已又破走之鐵嶺鎮西諸堡
增秩二等朶顏烏魯斯哈勒以四千騎毀牆入成梁禦
却之建州都指揮王杲故與撫順通馬市及是誘殺備
禦裴承祖成梁請討之明年十月杲復大入成梁檄副
將楊騰游擊王惟屏分屯要害而今參將曹簋挑戰諸
軍四面起敵大奔盡聚杲寨寨地高杲深溝堅壘以自
固成梁用火器攻之破數柵矢石雨下把總于志文秦

得倚先登諸將繼之杲走高臺射殺志文會大風起縱
火焚之先後斬馘千一百餘級毀其營壘而還進左都
督世廕都指揮同知杲大創不能軍走匿阿哈鼐寨曹
鼐勒精騎往杲走南關王台執以獻斬之三年春土默
特犯長勇堡擊敗之其冬綽哈大會哈斯坦黃台吉布
延台吉伊勒登努圖克恭圖都噶勒等二萬餘騎從平
虜堡南掠副將曹鼐馳擊遂轉掠瀋陽見城外列營乃
據西北高墩成梁邀戰發火器敵大潰棄輜重走追至

河溝乘勝渡河擊斬以千計加太子大保世廕錦衣千戶明年哈斯坦大衛徵營大清堡邊外謀錦義成梁率選鋒馳二百里逼其營破之殺部長四人獲級六十有奇五月土默特復入聯營河東遣零騎西掠成梁掩其巢得利而還明年正月蘇巴爾噶糾土默特入營劈山成梁馳至丁字泊敵方分騎繞牆入成梁夜出塞二百里搗破劈山營獲級四百三十馘其長五人加太保世廕本衛指揮使三月游擊陶承譽擊敵長定堡獻馘四

百七十有奇帝告謝郊廟大行賞賚廕成梁世指揮僉
事有言所殺乃土默特部曲因盜牛羊事覺懼罪來歸
承襲掩殺之給事中光懋因請治承襲殺降罪御史勘
如懋言兵部尚書方逢時督撫梁夢龍周詠先與承襲
同叙功力為解卒如御史奏盡奪諸臣恩命六月敵犯
鎮靜堡復擊退之十二月蘇巴爾噶綽哈努圖克恭圖
會土默特黃台吉大小衛徵布爾噶鴻和台等三萬餘
騎壁遼河攻東昌堡深入耀州成梁遣諸將分屯要害

以遏之親提銳卒出塞二百餘里直搗圜山斬首八百四十及其長九人獲馬千二百匹敵聞之皆倉皇走出塞論功封寧遠伯歲祿八百石時土默特數求貢市關吏不許大恨七年十月復以四萬騎自前屯錦川營深入成梁命諸將堅壁自督參將楊栗等遏其衝會戚繼光來援敵遂退俄又與蘇巴爾噶合壁紅土城聲言入海州而分兵入錦義成梁踰塞二百餘里直抵紅土城擊敗之獲首功四百七十有奇迺東都督王烏塔故通

市寬旬後參將徐國輔弟國臣強抑市價烏塔乃與趙索囉科數遣零騎侵邊明年三月以六百騎犯暖陽及黃岡嶺指揮王宗義戰死復以千餘騎從永甸入成梁擊走之追出塞二百里敵以騎卒拒而步卒登山鼓譟成梁大敗之斬首七百五十盡毀其營壘捷聞并錄紅土城功予成梁世襲秋烏塔復犯寬甸副將姚大節擊破之烏塔由是不振土默特數侵邊不得志忿甚益徵諸部兵分犯錦義及右屯大凌河以城堡堅不可克而

成梁及薊鎮兵亦集乃引去無何復以二萬餘騎從大鎮堡入攻錦州參將熊朝臣固守而遣部將周之望王應榮出戰頗有斬獲矢盡皆戰死敵乃分掠小凌河松山杏山成梁馳援始出境九年正月土默特復與哈斯坦大小衛徵布延台吉諾穆圖黃台吉伊勒登努圖克恭圖綽和爾聚兵塞下謀入廣寧成梁率輕騎從大寧堡出去塞四百餘里至鄂蘭圖大戰自辰迄未敵敗走官軍將還敵來追成梁逆擊且戰且行先後斬首三百

四十及其長八人錄功增歲祿百石世廕一等四月哈
斯坦伊勒登小岱青布延圖入遼陽副將曹簠追至長
安堡遇伏失千總陳鵬以下三百十七人馬死四百六
十匹遂大掠人畜而去簠等下吏成梁不問十月土默
特復連蘇巴爾噶等十餘萬騎攻圍廣寧不克轉掠圍
山堡盤山驛及十三山驛攻義州成梁却之十年三月
蘇巴爾噶率弟綽哈子布延圖犯義州成梁禦之鎮夷
堡設伏待之蘇巴爾噶入參將李平胡射中其脅墜馬

蒼頭李有名前斬之寇奔追馘百餘級綽哈等慟哭去
蘇巴爾噶為遼左患二十年至是死帝大喜詔賜甲第
京師世廕錦衣指揮使初王杲死子阿爾台走依翁台
長子呼爾噶以翁台獻其父嘗欲報之翁台死呼爾噶
勢衰阿爾台附北關合攻呼爾噶又數犯孤山汎河成
梁出塞過於曹子谷斬首一千有奇獲馬五百阿爾台
復糾阿海連兵入抵瀋陽城南渾河大掠去成梁從撫順
出塞百餘里火攻古勒塞射死阿爾台連破阿海寨擊

殺之獻馘二千三百杲部遂滅錄功增歲祿百石世廕
指揮僉事北關青噶諾爾楊珠諾爾素雙南關翁台沒屢侵
其季子蒙古博囉且藉土默特努圖克鴻和台兵侵邊
境其年十二月巡撫李松使備禦霍九臯許之貢市青噶諾爾楊
珠諾爾率二千騎詣鎮北關謁松九臯見其兵盛譙讓
之則以三百騎入松先伏甲於旁約二人不受撫則礮舉
甲起頃之二人抵關據鞍不避松叱之九臯麾使下其
徒遽拔刀擊九臯并殺侍卒十餘人於是礮鳴伏盡起擊斬

二人并其從騎與青噶諾爾子烏遜博囉楊誅諾爾子哈拉哈瑪盡殲焉成梁聞礮急出塞擊其留騎斬首千五百有奇餘衆刑白馬攢刀誓永受約束乃旋師錄功增歲祿二百石改前廕指揮僉事為錦永衛指揮使方成梁之出塞也綽哈等以數萬騎入蒲河及大寧堡將士防禦六日始出塞十三年二月巴圖爾欲報父蘇巴爾噶之怨偕從父綽哈姑壻呼達糾西部伊勒登等以數萬騎入掠瀋陽既退駐牧遼河聲犯開原鐵嶺成梁與巡撫李

松潛為浮橋濟師踰塞百五十里疾掩其帳寇已先覺
整衆逆戰成梁為疊陣親督前陣擊而松以後陣繼之
斬首八百有奇捷聞增歲祿百石改廕錦衣指揮使為
都指揮使其年五月敵犯瀋陽伏精騎塞下誘官軍游
擊韓元功追襲之敗死閏九月諸部長復犯蒲河殺裨
將數人大剽掠而西部音登亦窺遼瀋成梁令部將李
平胡出塞三百五十里搗破音登營斬首一百八級諸
部長始引去十四年二月土默特部長伊克輝章糾巴

圖爾綽哈呼達等三萬騎約土默特諸子共馳遼陽挾賞成梁偵得之率副將楊燮參將李寧李興孫守廉以輕騎出鎮邊堡晝伏夜行二百餘里至庫克穆稜大風雷敵不覺既至風日晴朗敵大驚發矢如雨將士冒死陷陣獲首功九百斬其長二十四人十月敵七八萬騎犯鎮夷諸堡閱五日始去十五年春東西部連營入犯八月復以七八萬騎犯鎮夷堡十月巴罕岱青糾土默特十萬騎由鎮夷大清二堡入數日始出北關既被創

後青噶諾爾子布扎爾與楊珠諾爾子納琳博囉漸強
盛數與南關呼爾噶子岱遜構兵成梁以南關勢弱謀
討北關以輔翊之明年五月率師直搗其巢布扎爾走
與納琳博囉合憑城守城四重攻之不下用巨礮擊碎
其外郭遂拔二城斬馘五百餘布扎爾等請降誓不復
叛乃班師十七年三月復犯義州入太平堡把總朱永
壽等一軍盡沒九月諾穆岱合博和木達長安三萬騎
復犯平虜堡備禦李有年把總馮文昇皆戰死成梁選

鋒沒者數百人敵大掠瀋陽蒲河榆林八日始去明年
二月布延台吉黃台吉大小衛徵結西部察罕塔塔爾
五萬餘騎復深入遼瀋海蓋成梁潛遣兵出塞襲之遇
伏死者千人成梁乃報首功二百八十得增祿廕土默
特族弟圖們台珠偕西部青巴圖恰卜實克及長安恭
圖十萬騎入海州成梁不敢擊縱掠數日而去十九年
閏二月成梁乘給事侯先春閱視謀邀搗巢功使副將
李寧等出鎮夷堡潛襲拜牲殺二百八十人師還遇敵

死者數千人成梁及總督蹇達不以聞巡按御史胡克儉盡發其先後欺罔狀語多侵政府疏雖不行成梁由是不安於位及先春還朝詆尤力帝意頗動成梁再疏辭疾言者亦踵至其年十一月帝竟從御史張鶴鳴言解成梁任以寧遠伯奉朝請明年已拜反寧夏御史梅國楨請用成梁給事中王德完持不可乃寢成梁鎮遼二十二年先後奏大捷者十帝輒祭告郊廟受廷臣賀蟒衣金繒歲賜稠疊邊帥武功之盛二百年来未有也

其始銳意封已拜師出必捷威振絕域已而位望益隆子弟盡列崇階僕隸無不榮顯貴極而驕奢侈無度軍貨馬價鹽課市賞歲乾沒不貲全遼商民之利盡籠入已以是灌輸權門結納朝士中外要人無不飽其重賕為之左右每奏捷內自閤部外自督撫而下大者進官廕子小亦增俸資金恩施優渥震耀當世而其戰功率在塞外易為緣飾若敵入內地則以堅壁清野為詞擁兵觀望甚或掩敗為功殺良民冒級閤部共為蒙蔽督

撫監司稍忤意輒排去之不得舉其法先後巡按陳登雲許守恩廉得其殺降冒功狀擬論奏之為巡撫李松顧養謙所沮止既而物議沸騰御史朱應轂給事中任應徵僉事李琯交章抨擊事頗有跡卒賴輿援反詰責言者及申時行許國王錫爵相繼謝政成梁失內主遂以去位成梁諸戰功率藉健兒其後健兒李平胡李寧李興秦得倚孫守廉輩皆富貴擁專城暮氣難振又轉相培植士馬蕭耗迨成梁去遼十年之間更易八帥邊

備益弛二十九年八月馬林獲罪大學士沈一貫言成
梁雖老尚堪將兵乃命再鎮遼東年已七十有六矣時
土默特長安及巴圖爾已死寇鈔漸稀而開原廣寧之
前復開馬木二市諸部眈眈市賞利爭就款以故成梁復
鎮八年遼左少事以閱視叙勞加至太傅當萬厯初元
時兵部侍郎汪道昆閱邊成梁獻議移建孤山堡於章
嘉哈喇甸險山堡於寬甸沿江新安四堡於長甸長嶺諸處仍
以孤山險山二參將戍之可拓地七八百里益收耕牧

之利道昆上於朝報可自是生聚日繁至六萬四千餘
戶及三十四年成梁以地孤懸難守與督撫蹇達趙楫
建議棄之盡徙居民於內地居民戀家室則以大軍驅
迫之死者狼籍成梁等反以招復逃人功增秩受賞兵
科給事中宋一韓力言棄地非策巡按御史熊廷弼勘
奏如一韓言一韓復連章極論帝素眷成梁悉留中不
下久之卒年九十弟成材參將子如松如柏如楨如樟
如梅皆總兵官如梓如梧如桂如楠亦皆至參將

如松字子茂成梁長子以父廕為都指揮同知充寧遠伯勲衛驍果敢戰少從父諳兵機再遷署都督僉事為神機營右副將萬歷十一年出為山西總兵官給事中黃道瞻等數言如松父子不當並居重鎮大學士申時行請保全之乃召僉書右府尋提督京城巡捕給事中邵庶嘗劾如松及其弟副總兵如柏不法且請稍抑以全終始不納十五年復以總兵官鎮宣府巡撫許守謙閱操如松引坐與並參政王學書却之語不相下幾攘

臂巡按御史王之棟因劾如松驕橫并詆學書帝為兩
奪其俸已復被論給事中葉初春請改調之乃命與山
西李迎恩更鎮其後軍政拾遺給事中閱視數遭論劾
帝終眷之不為動召僉書中府二十年已拜反寧夏御史梅
國楨薦如松大將才其弟如梅如樟並年少英傑宜令
討賊乃命如松為提督陝西討逆軍務總兵官即以國
楨監之武臣有提督自如松始也已命盡統遼東宣府
大同山西諸道援軍六月抵寧夏如松以權任既重不

欲受總督制事輒專行兵科許弘綱等以為非制尚書
石星亦言如松敕書受督臣節度不得自專帝乃下詔
申飭先是時諸將董一奎麻貴等數攻城不下松至攻
益力用布囊三萬實以土踐之登為礮石所却如樟夜
攀雲梯上不克游擊龔子敬提苗兵攻南關如松乘勢
將登亦不克乃決策水攻巴拜窘遣養子克將該往勾
套寇如松令部將李寧追斬之已套寇以萬餘騎至張
亮堡如松力戰手斬士卒畏縮者寇竟敗去水浸北關

城崩如松如及蕭如薰等佯擊北關誘賊潛以銳師襲南
關攀雲梯上巴拜及子承恩自斬叛黨劉東暘許朝乞
貸死於是如松先登如薰及麻貴劉承嗣等繼之滅巴
拜族錄功進都督世廕錦衣指揮同知會朝鮮倭患棘
詔如松提督薊遼保定山東諸軍尅期東征弟如柏如
梅並率師援勦如梅新立功氣益驕與經畧宋應昌不
相下故事大帥初見督師甲冑庭謁出易冠帶始加禮
貌如松用監司謁督撫儀素服側坐而已十二月如松

至軍沈惟敬自倭歸言倭酋行長願封請退平壤迤西
以大同江為界如松叱惟敬儉邪欲斬之參謀李應試
曰藉惟敬給倭封而陰襲之奇計也如松以為然乃置
惟敬於營誓師渡江二十一年正月四日師次肅寧館
行長以為封使將至遣牙將二十人來迎如松檄游擊
李寧生縛之倭猝起格鬪僅獲三人餘走還行長大駭
復遣所親信小西飛來謁如松慰遣之六日次平壤行
長猶以為封使也貯風月樓以待羣倭花衣夾道迎如

松分布諸軍抵平壤城諸將逡巡未入彤大露倭悉登陴拒守是夜襲如柏營擊却之明旦如松下令諸軍無割首級攻圍缺東面以倭素易朝鮮軍令副將祖承訓詭為其裝潛伏西南令游擊吳惟忠攻迤北牡丹峯而如松親提大軍直抵城下攻其東南倭礮矢如雨軍少却如松斬先退者以徇募死士援鉤梯直上倭方輕南面朝鮮軍承訓等乃卸裝露明甲倭大驚急分兵捍拒如松已督副將楊元等軍自小西門先登如柏等亦從大

西門入火器並發烟燄蔽空惟忠中礮傷胸猶奮呼督戰如松馬斃於礮易馬馳墮蹙躍而上麾兵益進將士無不一當百遂克之獲首功千二百有奇倭退保風月樓夜半行長渡大同江遁還龍山寧及參將查大受率精卒三千潛伏東江間道復斬級三百六十乘勝逐北十九日如柏遂復開城所失黃海平安京畿江源四道並復酋清正據咸鏡亦遁還王京官軍既連勝有輕敵心二十七日再進師朝鮮人以賊棄王京告如松信之

將輕騎趨碧蹄館距王京三十里猝遇倭圍數重如松
督部下鏖戰一金甲倭搏如松急指揮李有聲殊死救
被殺如柏等等奮前夾擊如梅射金甲倭墮馬楊元兵
亦至斫重圍入倭乃退官軍喪失甚多會天久雨騎入
稻畦中不得逞倭背岳山面漢水聯營城中廣樹飛樓
箭礮不絕官軍乃退駐開城二月既望諜報倭以二十
萬衆入寇如松令元軍平壤扼大同江接餉道如柏等
軍寶山諸處為聲援大受軍臨津留寧承訓軍開城而

身自東西調度聞倭將平秀嘉據龍山倉積粟數十萬
密令大受率死士從間焚之倭遂乏食初官軍拔平壤
鋒銳甚不復問封貢事及碧蹄敗衄如松氣大索應昌
如松急欲休息而倭亦芻糧並絕且懲平壤之敗有歸
志於是惟敬款議復行四月十八日倭棄王京遁如松
與應昌入城遣兵渡漢江尾倭後將擊其隋歸倭步步
為營分番迭休官軍不敢擊倭乃結營釜山為久留計
時兵部尚書石星力主封貢議撤兵獨留劉綎拒守如

松乃以十二月班師論功加太子太保增歲祿百石言者詆其和親辱國屢攻擊之帝不問二十五年冬遼東總兵董一元罷廷推者三中旨特用如松言路復交章力爭帝置不報如松感帝知氣益奮明年四月王默特犯遼東如松率輕騎遠出搗巢中伏力戰死帝痛悼令具衣冠歸葬贈少保寧遠伯立祠謚忠烈以其弟如梅代為總兵官授長子世忠錦衣衛指揮使掌南鎮撫司仍充寧遠伯勲衛復廕一子奉衛指揮使世襲恤典優

遲皆出特恩云世忠未久卒無子弟顯忠由廕歷遼東副總兵當嗣爵朝臣方惡李氏無為言者至崇禎中如松妻武氏懇於朝章下部議竟寢後莊烈帝念成梁功顯忠子尊祖得嗣寧遠伯闖賊陷京師遇難

如柏字子貞成梁第二子由父廕為錦衣千戶嘗與客會飲礮聲徹大內下吏免官再以廕為指揮僉事數從父出塞有功歷密雲游擊黃花嶺參將薊鎮副總兵萬曆十六年御史任養心言李氏兵權太盛姻親廝養分

操兵柄環神京數千里縱橫蟠據不可動搖如柏貪淫
跋扈尤甚不早為計恐生他變帝乃解如柏任於是成
梁上書乞罷并請盡罷子弟官帝慰留不許久之起故
官署宣府參將引疾歸如松之禦倭朝鮮也詔如柏署
都督僉事先率師赴援既拔平壤如柏疾趨開城攻克
之斬首百六十有奇師旋進都督同知為五軍營副將
尋出為貴州總兵二十三年改鎮寧夏卓哩克圖犯平
虜橫城如柏邀之大斬獲首二百七十有奇進右都督

再以疾歸家居二十餘年會遼東總兵官張承廕戰歿
文武大臣英國公張惟賢等合疏薦如柏詔以故官鎮
遼東蒙古綽哈入犯督諸將擊却之始成梁如松為將
厚畜健兒故所向克捷至是父兄故部曲已無復存而
如柏暨諸弟放情酒色亦無復少年英銳特以李氏世
將起自廢籍中顧如柏中情怯惟左次避敵而已我

大清師臨河如柏故引軍防懿路及楊鎬四路出師令
如柏以一軍出鴉鵲關甫抵呼蘭路鎬聞杜松馬林兩

軍已覆急檄如柏還

大清哨兵二十人見之登山鳴螺作大軍追擊狀如柏軍大驚奔走相蹴死者千餘人御史給事中交章論劾給事中李奇珍連䟽爭尤力帝終念李氏詔還候勘既入都言者不已如柏懼遂自裁

如楨成梁第三子由父蔭為指揮使屢加至右都督並在錦永嘗掌南北鎮撫司提督西司房列環衛者四十年最後軍政拾遺部議罷職章久留不下如楨雖將家

子然未歷行陣不知兵及兄如柏革任遼人謂李氏世鎮遼東遼人憚服非再用李氏不可巡撫周永春以為言而是時如柏兄弟獨如楨在兵部尚書黃嘉善遂徇其請以如楨名上帝即可之時萬曆四十七年四月也如楨藉父兄勢又自以錦永近臣不肯居人下未出關即遣使與總督汪可受講鈞禮朝議譁然嘉善亦特疏言之如楨始怏怏去既抵遼經畧楊鎬使守鐵嶺鐵嶺故李氏宗族墳墓所在當如柏還京其族黨部曲高貴

者悉隨之而西城中為空後鎬以孤城難守令如楨還屯瀋陽僅以參將丁碧等防守力益弱

大清兵臨城如楨擁兵不救城遂失言官交章論列經畧熊廷弼亦論如楨十不堪乃罷任天啓初言者復力攻下獄論死崇禎四年帝念成梁勲特免死充軍

如樟亦由父廕歷都指揮僉事從兄如松征寧夏先登有功累進都督僉事歷廣西延綏總兵官

如梅字子清亦由父廕歷都指揮僉事從兄如松征日

本却敵先發屢還遼東副總兵二十四年綽哈布延圖
將入犯如梅謀先襲之督部將方時新等出塞三百里
直搗其廬帳斬首百餘級而還明年如梅與參政楊鎬
謀復從鎮西堡出塞潛襲敵營失利損部將十人士卒
百六十人如梅以血戰重創免罪日本封事敗其年八
月進署都督僉事充禦倭副總兵赴朝鮮援勦時麻貴
三路進師令如梅將左軍與右軍共攻蔚山如梅偕參
將楊登山騎兵先進設伏海濱而令遊擊巴薩以輕騎

誘賊斬首四百有奇餘賊遁歸島山副將陳寅冒矢石奮呼上破柵兩重至第三柵垂拔楊鎬為總理宿與如梅暱不欲寅功出其上遽鳴金收軍翊日如梅至攻之不能拔已而賊援至如梅軍先奔諸軍亦相繼潰贊畫主事丁應泰劾鎬并劾如梅當斬者二當罪者十帝不納旋用為禦倭總兵官會其兄如松戰歿即命如梅馳代之踰年坐擁兵畏蒞劾罷久之起僉書左府四十年鎬巡撫遼東力薦如梅為帥不得至以死爭給事中麻

僖御史楊州鶴力持不可乃止成梁諸子如松最果敢
有父風其次稱如梅然躁動非大將才獨楊鎬深信後
復倚任其兄如柏卒以致敗

麻貴大同右衛人父祿嘉靖中為大同參將從鎮帥劉
漢襲板升大獲諳達圍右衛祿與副將尚表固守乘間
擊斬其部長寇乃退錫林阿犯京東祿以宣府副總兵
入衛與子遊擊錦並有却敵功貴由舍人從軍積功至
都指揮僉事充宣府遊擊將軍隆慶中遷大同新平堡

參將寇大入掠山陰懷仁應州將吏並獲罪獨貴與兄
副將錦拒戰有功受賞萬厯初再遷大同副總兵十年
冬以都督僉事充寧夏總兵官無何徙鎮大同時諸部
納款久徹哩克襲封順義王奉中國益虔貴頻以安邊
勞蒙賜賚十九年為閱視少卿曾乾亨所劾謫戍邊明
年寧夏巴拜反廷議貴健將知兵且多畜家丁乃起戍中為
副將總兵討賊屢攻城不克其五月巴拜以套寇五百
騎圍平虜堡貴選精卒三百間道馳却之俄以總督魏

學會命撫卓哩克圖伊勒敦宰桑於橫城啖以重利皆不應貴乃還攻城寧夏總兵董一奎攻其南固原總兵李煦攻其西故總兵劉承嗣攻其北牛秉忠攻其東貴以遊兵策應巴拜自北門出戰將往勾套部貴逐之入城別遣將馬孔英麻承詔等擊套寇援兵俘斬百二十人巴拜初與套部深相結諸部長稱之為王日坐卓哩克圖帳中主籌畫至是不敢復出俄朝命蕭如薰代董一奎盡將諸道援兵以貴為副而李如松軍亦至攻益

急賊奉黃金繡蟒于布色圖等請急徇靈州先據下馬
關阻饗道布色圖與章圖哩果合兵犯定邊而宰桑從
花馬池西沙湃入貴迎擊挫宰桑於石溝會董一元搗
圖們巢諸部長解去賊復乞援於卓哩克圖擁衆大入
如松率勁騎迎戰張亮堡自卯迄巳敵銳甚會貴及李
如樟等兵至夾擊之寇乃却逐北至賀蘭山獲首級百
二十餘持示賊賊益恟懼無何城破賊盡平貴以功增
秩予廕尋擢總兵官鎮守延綏二十二年七月布色圖

糾諸部深入定邊營張春并貴乘虛搗其帳於套中斬首二百五十有奇還自寧塞復邀其零騎會寇留內地久轉掠至下馬關寧夏總兵蕭如薰不能禦總督葉夢熊急檄貴赴援督副將蕭如蘭等連戰曬馬臺薛家窪斬首二百三十有奇獲畜產萬五千帝為告廟宣捷進署都督同知予世廕明年布色圖復入寨掠八日而還順義王徹哩克約之納款不從復擬大入貴勒兵萬五千入遊擊閻逢時等出紅山為中軍參將師以律等出

高家堡神木孤山為左軍參將孫朝梁等出定邊安邊
平山為右軍而自以大軍當一面銜枚疾趨踰塞六十
里寇莫知所防大潰俘斬四百有奇獲馬駝牛羊千五
百再進秩予廕尋以病歸二十五年日本封事敗起貴
備倭總兵官赴朝鮮已加提督盡統南北諸軍貴馳至
王京倭已入慶州據閑山島圍南原守將楊元遁全州
守將陳恩衷亦遁倭乘勢逼王京貴別遣副將解生守
稷山朝鮮亦令都體察使李元翼出忠清道遮賊鋒生

頗有斬獲功參將彭友德亦破賊青山倭將行長退屯井邑清正還慶州經畧邢玠經理楊鎬先後至分兵三協左李如梅右李芳春解生中高策貴與鎬督左右協兵專攻清正策駐宜寧東援兩協西扼行長諸軍至慶州倭悉退屯蔚山如梅誘敗之清正退保島山築三砦自固遊擊茅國器率死士拔其砦斬馘六百五十諸軍遂進圍其城城新築以石堅甚將士仰攻多死圍十日倭龍敗生兵明年正月二日行長來援九將兵俱潰賊

張旗幟江上鎬懼倉皇撤師詭以捷奏既而敗狀聞帝
罷鎬責貴以功贖與劉綎陳璘董一元分四路貴居東
當清正數戰有功會平秀吉死官軍益力攻十一月清
正先遁貴遂入島山西浦諸路共俘斬二千二百有奇
明年三月旋師進右都督于世廕三十八年命貴鎮遼
東秦寧綽哈素梁鰲九子各將兵他部濟賽努圖克又
助之邊將畏戰但以增歲賞為事寇益無所忌明年臨
邊要賞將士出不意擊之拔營遁徙額呼蘇居焉其地

忽天鳴地震綽哈驚懼再徙渡老河去邊幾四百里其
第三子色特爾哂之南移庫克穆稜伺隙入犯貴伏兵
敗之追北至白雲山斬馘三百四十有奇色特爾憤謀
復讐糾濟賽伊勒登不應乃東糾布延昆巴雅爾西糾
哈喇汗奈曼合犯清河皆潰伊勒登等懼代綽哈求款
邊境乃寧明年察罕呼爾敦圖以三萬騎入掠穆家堡
敗去其夏貴引病乞罷詔乘傳歸貴果毅驍捷善用兵
東西並著功伐先後承特賜者七錫世廕者六及歿予

祭葬稱一時良將焉兄錦少從父行陣有戰功累官千
總協守大同右衛千戶魏昂者坐罪亡入沙漠引寇至
城下挾取妻子錦伏甲禽之諳達圍城數突圍城卒完
尋以殺人并父奪官下吏當事以塞上方用兵而錦父
子兄弟並敢戰曲法貸之屢遷宣府遊擊將軍以勤王
功進秩一等遷大同參將隆慶初進本鎮副總兵從趙
奇出塞敗寇兵與弟貴並有保境功諳達納款錦招塞
外叛人歸者甚衆萬厯五年擢山西總兵官尋改鎮宣

府卒錦子承勛遼東副總兵都督僉事南京後府僉書
從子承恩都督同知宣府延綏大同總兵官更歷諸鎮
以勇力聞後起援遼東屢退避下獄當死詔內馬八百
匹免罪其家遂破承詔寧夏參將從平巴拜有功後為
蒼頭所弑承訓薊鎮副總兵承宣洮岷副總兵承宗遼
東副總兵天啟初戰死沙嶺麻氏多將才人以方鐵嶺
李氏曰東李西麻

贊曰自諳達款宣大薊門設守固而遼獨被兵成梁遂

擅戰功至剖符受封震耀一時倘亦有天幸歟麻貴宣
力東西勲閥可稱兩家子弟多歷要鎮是以時論以李
麻並列然列戟擁麾世傳將種而恒怯退避隳其家聲
語曰將門有將諸人得無愧乎

明史卷二百三十八

欽定四庫全書

明史卷二百三十八考證

李成梁傳錫林阿大入遼東

臣方煒按錫林阿大入

遼東考本紀謂犯錦州也謹識

李成梁傳杲走南關都督王台執以獻斬之

臣方煒

按明實錄翁台執王杲時並送進王杲原擄軍士八

十二名謹識

李成梁傳復以二萬餘騎從大鎮堡入攻錦州

臣方

煒按二萬餘騎從大鎮堡入攻錦州分掠小凌河等處考明實錄係萬歷九年正月事紀載互異謹識

李成梁傳帝竟從御史張鶴鳴言解成梁任臣方煒

按明實錄張鶴鳴疏稱成梁血氣既衰罪惡貫盈謹識

李成梁傳馬林獲罪臣方煒按馬林獲罪事詳馬芳

傳謹識

李成梁傳子如松附給事中邵庶嘗劾如松及其弟副

總兵如栢不法 臣方煒按庶嘗劾如松與如栢不法當即指後文所云驕橫及如栢傳所云會飲諸事
謹識

李成梁傳 子如楨附經畧熊廷弼亦論如楨十不堪

臣方煒按十不堪史未臚列他書亦無可考謹識

李成梁傳 子如梅附丁應泰劾鎬并劾如梅當斬者二

當罪者十 臣方煒按當斬者二當罪者十傳未臚

列考楊鎬傳亦第言丁應泰劾鎬當罪者二十八可

羞者十如梅事未詳及他書皆無可考謹識

麻貴傳斬首二百五十有奇

臣

方煒按明實錄七月

內前後斬獲首級一千六百餘與傳所載不符謹識

明史卷二百三十八考證

欽定四庫全書

明史卷二百三十九

大學士張廷玉等奉敕修

列傳第一百二十七

張臣

子承廕全昌

孫應昌德昌

董一元

王保

杜

桐

弟孫弘松域

孫文煥

蕭如薰

達雲

尤繼先

官秉忠

柴國柱

李懷信

張臣榆林衛人起行伍為隊長躋捷精悍搏戰好陷堅
從千總劉朋守黃甫川朋遇寇喪馬被圍臣單騎馳救
射中其魁奪馬載朋歸由此知名旋代朋職屢戰跨馬
梁李家溝高家堡田家梁西紅山並有功遷宣府膳房
堡守備寇嘗大入環攻堡欲生得臣臣召麾下酌水為
酒歡呼歌飲寇莫測所為不敢登臣夜決圍出取他道
以歸上官壯之擢延綏入衛遊擊將軍隆慶元年九月
土默特大入昌黎撫寧樂亭盧龍騎至灤河諸將莫敢

戰臣獨勒兵赴之遼帥王治道曰敵衆我寡往必無利
臣不顧率所部千人擐甲直馳呼聲震山谷寇以數騎
嘗奮前斬之追至棒槌崖斬首百十餘級墜崖死傷者
無筭事寧薊鎮諸將悉獲罪臣以功增秩二級無何寇
潛入場子嶺參將吳昂被殺命臣代之尋進副總兵領
總督標下事改守薊鎮西協萬厯初錄秋防功進署都
督僉事綽滿潛入古北口參將苑宗儒追至十八盤山
戰歿餘衆被圍臣急偕遊擊高廷禮等馳救寇始去坐

錫一秩五年春以總兵官鎮守寧夏順義王諱達報怨衛
拉特欲取道賀蘭臣不可諱達恚語不遜臣夜決漢唐
二渠水道不通復陳兵赤水口諱達乃從山後去三歲
互市毋敢譁者閱邊給事中以苛禮責望劾罷之十一
年小阿布呼犯黑峪關守將陳文治以下俱逮繫詔起
臣副總兵駐守馬蘭峪會朵顏長安屢擾邊薊鎮總兵
官楊四畏不能禦乃調四畏保定而徙臣代之長安雅
憚臣使其從母圖幹妻棟固款關乞降乃撫賞如初孟

克章者諳達弟婁巴圖棄妾葉磋與小阿布呼犯黑峪
關罷歲賞既納款復猖獗以謾詞報邊臣而令大必濟
代為謝罪大必濟者順義王徹辰汗棄妾葉沁等測其
詐令將士出塞捕二十三人繫之獄令還我被掠人孟
克章以所愛者五人在俘中許獻還所掠親叩關索故
賞臣等并召大必濟入演武場譙責甚厲兩婦叩頭請
死乃貸之先後獻還八十餘人中有被拘數十年者臣
以功紀錄優叙尋進署都督同知召僉書左府事出為

陝西總兵官鎮守固原十八年春移鎮甘肅浩爾齊犯
洮河布色圖將往助之其母泣沮不從遂攜妻女行由
永昌宋家莊穴牆入臣逆戰水泉三道溝手格殺數人
奪其坐纛布色圖及其黨綽和爾並中流矢走臣亦被
創將士斬級以百數生獲其愛女及牛馬羊萬八百有
奇布色圖仰天大慟曰傷哉我女悔不用母言以至此
也自是不敢歸巢與宰桑匿西海已屬宰桑謝罪其母
及順義王亦代為言乃還其女而使歸套臣以功進秩

為真時諸部長桀驁甚經畧鄭洛專主欺臣以為不足
恃上書陳八難五要大畧云邊薄兵寡餉絀寇驕諸部
順逆難明宜復額兵嚴勾卒足糧餉分敵勢明賞罰且
以創重乞歸帝不許後二年謝病去臣更歷四鎮名著
塞垣為一時良將子承廕由父廕積功至延綏副總兵
勇而有謀尤精騎射數鏖戰未嘗挫衄萬厯三十七年
代王威為延綏總兵官沙津及孟克什勒數犯邊是年
冬復犯波羅神木承廕邀卻之追斬八十餘人沙津欲

堡承廕擊走之俘斬百二十有奇四十年沙津復入塞
承廕遮擊之嚮水斬首百七十餘級積前功進署都督
同知世廕本衛副千戶是歲遼東總兵官麻貴罷敕承
廕馳代之莽錦諸部近寧前守將祖大壽間出獵被圍
曹莊將士死者二百三十人被掠者六百餘人大壽以
數騎免事聞論死承廕初抵任獲免烏克等犯中後所
拒斬其二長餘走出塞時呼爾敦圖綽哈努圖克濟賽

逼處遼境無歲不犯邊承廕未至時呼爾敦圖以三萬
騎犯穆家堡參將郎名忠等遏斬其四十餘騎及再舉
守將梁汝貴襲破其營已而奈曼諸部連犯中後所連
山驛副總兵李繼功力戰殪其魁徐引去自是呼爾敦
圖所屬古英阿哈等三十餘部悉奉約束遼西得少安
承廕旋以病去甫歲餘起守薊鎮未至復改鎮遼東四
十六年四月我

太祖高皇帝起兵拔撫順巡撫李維翰趣承廕赴援承廕急率

副將頗廷相參將蒲世芳遊擊梁汝貴等諸營並發次撫順承廕據山險分軍三立營浚濠布列火器甫交鋒

大清兵蹴之大潰承廕世芳皆戰死廷相汝貴已潰圍出見失主將亦臨陣死將士死者萬人生還者十無一二舉朝震駭既而撫安三岔免白家衝三堡連失詔逮維翰贈承廕少保左都督立祠曰精忠世廕指揮僉事廷相以下贈廕有差承廕子應昌全昌德昌應昌嗣祖臣職當為指揮僉事以父陣亡增三秩為都司僉書經

畧楊鎬用為左翼遊擊四路出師使從李如栢天啟元年遷大同井坪參將調延綏二年秋河套入犯不能禦免歸督師孫承宗召置麾下命駐錦州承宗去高第盡撤松錦守具應昌亦歸崇禎二年總督楊鶴檄應昌署定邊鎮將事河套入寇擊斬百二十餘級擢昌平副總兵鶴遂薦應昌以副將鎮定邊四年春神一元陷保安應昌偕左光先破斬一元其第一魁代領其衆圍慶陽應昌及杜文煥趨戰圍始解巴扎納圍米脂應昌偕王

承恩擊走之楊鶴撫一魁處之寧塞而殺其黨茹成名
賊黨張孟金黃友才懼挾一魁以叛延綏巡撫張福臻
令應昌及馬科擊之斬首千七百餘級友才走一魁守
不下其冬洪承疇代鶴命參政戴君恩總兵曹文詔同
應昌討之數敗賊賊棄城走文詔偕應昌擊敗之駙馬
溝明年春應昌禽友才浞天猴臨宜君鄜州襲靖邊應
昌追敗之射傷賊將白廣恩八月山西總兵官馬士麟
病免擢應昌都督僉事代之言者謂寧武卒善逃宜令

應昌率所部三千人以從報可王之臣臨臨縣其地倚黃雲山榆林河水出焉入於黃河城三面峭壁西阻水巡撫許鼎臣總督張宗衡督兵攻賊與土寇田福田科等相倚久不拔會王自用臨遼州逼會城鼎臣還專以恢復責應昌六年春賊約福劫官軍撫標中軍陳國威因偽稱之臣往逆斬福頭懸城下急擊賊始降應昌在關中威名甚著及是選悞逗撓務與賊相避總督宗衡五檄之不赴奏諸朝限應昌與文詔三月平賊應昌避

賊不擊殺良民冒功為巡按御史李嵩兵科祝世美所劾帝乃遣近侍為應昌內中軍七月部卒潰鳴謙驛監視中官劉允中劾其避賊帝猶貸之令會勦畿南賊久之擊賊平山偽報首功連為允中及巡按御史馮明珮真定巡撫周堪賡所劾帝令圖功自贖七年春追賊靈寶稍有功已擊賊均州五嶺山敗績身中一矢退還河南其弟全昌為宣府總兵官宣府有警令應昌援又無功命解職候勘八年洪承疇出師河南令率私家士馬

以從三月抵信陽會賊大入秦承疇命應昌及鄧玘尤
翟文防漢江南北玘死承疇以賊必由鳳縣棧道直入
畧陽改命應昌翟文自鄖陽轉赴興安漢中以會左光
先趙光遠諸軍至六月艾萬年曹文詔相繼戰歿賊盡
趨西安承疇急檄應昌及光先還救八月李自成陷咸
陽越二日應昌光先兵至擊斬四百四十餘級獲軍師
一人及全昌兵敗陷賊其潰卒歸關中掠沿河州縣山
西巡撫吳甡請令應昌收置麾下應昌已得疾不能軍

無何卒全昌由廕叙歷官靈州參將崇禎四年與同官
趙大允擊點燈子於中部連戰郃陽韓城首功功多巡
撫練國事請加二將副將銜大允駐耀州富平間拒賊
西路全昌駐韓城郃陽間拒賊東路五年七月代應昌
為定邊副總兵曹文詔追賊隴州平鳳界全昌及馬科
率千人應之珍滅殆盡明年五月擢署都督僉事充總
兵官鎮守宣府應昌方鎮山西兄弟接壤為大帥明年
七月

大清兵西征察罕旋師入其境攻圍龍門新城赤城克保安州薄鎮城全昌嬰城固守已而

大清兵西行全昌進兵應州帝以其孤軍敕吳襄尤世威赴援不應全昌至渾源以捷聞還軍葛峪羊房口襄等復不援八月

大清兵再入其境閏八月四日克萬全右衛他城堡多失守既解嚴兄應昌以罪解職命全昌并將其軍兵科常自裕言文臣張宗衡等重論而武臣輕貸非法於是

全昌與文詔並戍邊用山西巡撫吳甡請命全昌文詔
為援剿總兵官與猛如虎等大破高加計八年春會洪
承疇於汝寧擊敗汝州賊俄西入關與祖大弼敗賊涇
陽未幾敗賊醴泉五月與賀人龍敗老回回於秦王嶺
尋解鳳翔圍走賊秦州敗之張家川已而都司田應龍
張應龍戰死艾萬年曹文詔相繼歿官軍益衰賊盡趨
西安承疇急檄全昌及曹變蛟先赴渭華格其前親督
軍尾其後却賊紅鄉溝賊乃南入商雒承疇又命全昌

及趙光遠提兵三千截潼關大峪口部卒大譁闌入榮
澤劫庫殺人河南巡撫元默請急援盧氏不聽光遠擅
歸關中全昌迤邐至潁州九月中追蝟子塊於沈邱瓦
店戰敗被執賊挾之攻蘄黃金昌因代賊求撫總理盧
象昇不許責全昌喪師辱國曰賊果欲降可滅其黨示
信賊不聽命久之全昌脫歸謂象昇陽和象昇令募兵
山陝尋薦之朝令赴軍前立功帝不許十年四月以楊
嗣昌言逮付法司謫戍邊衛德昌崇禎初為清水營守

備三年夏勦王嘉胤被傷坐奪官久之起歷保定參將連破土寇仁義王十四年春總督楊文岳命從虎大威以五千人援開封不敢進其冬擢保定副總兵仍從文岳數有功十六年卒贈特進榮祿大夫左都督

董一元宣府前衛人父暘嘉靖中為宣府遊擊將軍諱達犯滴水崖力戰死贈官錫廕春秋世祝兄一奎都督僉事歷鎮山西延綏寧夏三邊以勇敢著一元勇如兄而智畧過之嘉靖時歷薊鎮遊擊將軍土默特哈斯坦

等以萬餘騎犯一片石總兵胡鎮禦之一元功最超俸
三級遷石門寨參將隆慶初破敵棒槌崖功復最再進
二級遷副總兵駐防古北口移守宣府萬曆十一年以
都督僉事為昌平總兵官尋徙宣府十五年徙薊州久
之劾罷鄭洛經畧洮河命一元練兵西寧浩爾齊入犯
一元擊之西川多所斬獲尋以副總兵協守寧夏擢延
綏總兵官巴拜之亂套中諸部長悉助之一元乘其西
掠輕騎搗圍們巢獲首功百三十驅其畜產而還寇內

掠引去進署都督同知入為中府僉事遼東自李成梁後代以楊紹勲一歲三失事尤繼先繼之半歲病去廷議擇帥乃以命一元泰寧蘇巴爾噶為官軍所殺其次子巴圖爾常欲復讐從父綽哈及姑壻呼達助之勢益強西部布延台吉故察罕土默特子也部衆十餘萬與巴圖爾東西相倚數侵邊至是布延合伊克輝章諾穆岱諸部聲犯廣寧而巴圖爾以綽哈呼達努圖克巴雅爾之衆營舊遼陽將入掠鎮武錦義一元與巡撫李化龍

策曰布延雖衆然去邊遠特患巴圖爾及綽哈耳今其衆不過萬騎破之則西部將不戰走乃遣副將孫守廉馳右屯禦西部而親將大軍匿鎮武外為空營待之寇馳入營大笑以為怯乃深入官軍忽從中起奮呼陷陣自午至酉寇大奔逐北七十餘里至白沙塢俘斬五百四十有奇獲馬駝二千計巴雅爾中矢死巴圖爾亦傷餘衆終夜馳天明駐馬環哭其明日布延台吉入右屯攻五日夜守廉等固守乃引去時二十二年十月也捷

聞帝大喜祭告郊廟宣捷行賞進一元左都督加太子
太保廕本衛世指揮使兵部尚書石星以下亦進秩有
差巴雅爾最慍悍諸部倚以為強嘗誘殺慶雲守備王
鳳翔坐草歲賞至是被殲諸部為奪氣其部下遂納款
巴圖爾綽哈及布延台吉昭托爾岱青復臨邊駐牧期
以明年正月畧遼瀋東西一元慮歲晏不備為寇所乘
乃先西巡以遏其鋒化龍亦留弱卒廣寧數西發以疑
寇一元捉健卒踏冰渡河監軍楊鎬與之俱度墨山天

大雪將士氣益奮行四百里三日夜乃抵其巢斬首百
二十級獲牛馬甲仗無筭全師而還巴圖爾以鎮武創
重嘆曰我竟不獲報父讐乎未幾死其衆散亂諸部悉
遠遁一元以功進世廕二秩久之以病歸命王保代朝
鮮再用師詔一元隸總督邢玠麾下參贊軍事尋代李
如梅為禦倭總兵官時兵分四路一元由中路禦石曼
子於泗州先拔晉州下望晉乘勝濟江連毀永春昆陽
二寨賊退保泗州老營攻下之遊擊盧得功陣歿前逼

新寨寨三面臨江一面通陸引海為濠海艘泊寨下千計築金海固城為左右翼一元分馬步夾攻步兵遊擊彭信古用大梃擊寨碎其數處衆軍進逼賊濠毀其柵忽營中礮裂煙焰漲天賊乘勢衝擊固城援賊亦至騎兵諸將先奔一元亦還晉州事聞詔斬遊擊馬呈文郝三聘落信古等職充為事官一元亦奪宮保貶秩三等會關白死倭遁走石曼子為陳璘所殲一元得還故秩賚銀幣久之卒一元歷鎮衝遠並著勞績與麻貴張臣

杜桐達雲為邊將選云王保榆林衛人驍勇絕倫起行
伍積功為延綏叅將萬曆十六年遷延綏定邊副總兵
十九年冬擢署都督僉事充昌平總兵官尋改山西薊
鎮總兵官張邦奇被劾命保與易任自嘉靖庚戌後薊
鎮重於他鎮穆宗有詔獲大小部長者破格酬他鎮不
得比迨諳達款寨宣大山西三鎮烽煙寂然陝西四鎮
以浩爾齊敗盟始復用兵然寇弱易禦獨秦寧察罕諸
部時時犯遼東而薊門密邇王畿與遼帥俱慎選以保

有威望用之。尢顏長安當張臣鎮薊時，納款居五年，復連寇石門路木馬峪花場谷，遂罷其市。賞後偕音登寇山海關，已又馳喜峰口要賞。邦奇佯許，增市誘殺其通事二十五人。長安益怒，犯大青山，頃之遣其黨沙哩勒等潛伏喜峰口射殺偵卒會保，已至遂禽之。長安每資沙哩勒籌策，懼而謝罪，獻還被掠人畜，保乃釋還。沙哩勒長安補五貢邊吏，始補二賞互市如初。御史陳遇又援穆宗詔以請，進保署都督同知，副將張守愚以

下皆進秩薊三協南營兵戚繼光所募也調攻朝鮮撤
還道石門鼓譟扶增月餉保誘令赴演武場擊之殺數
百人以反聞給事中載士衡御史汪以時言南兵未嘗
反保縱意擊殺請遣官按問巡關御史馬文卿庇保言
南兵大逆有十尚書石星附會之遂以定變功進保秩
為真廕子督撫孫鑛李頤等亦進官受賜時論尤之二
十三年冬順義王徹哩克弟噶勒圖卒三軍犯白馬關
及東西臺為守備徐光啟副將李芳春戴延春所却明年

秋復偕部長多博犯黑谷頂敗而去保庭其再至分營
升連口及橫河免寇果馳橫河官軍夜半疾抵石塘嶺
襲其營寇大驚潰乘勢追出塞其冬復犯羅文峪敗去
詔代一元鎮遼東朝鮮再用師敕保防海卒於海州贈
左都督子學書宣府總兵官學詩學禮並副總兵學書
既里居守榆林城拒李自成不屈死

杜桐字來儀崑山人徙延安衛萬厯初由世廕累官清
水營守備以謀勇著遷延綏衛遊擊將軍尋改古北口

叅將用總督梁夢龍薦擢延綏副總兵十四年就拜署
都督僉事充總兵官時布色圖以都督同知為套中主
威令不行其下各雄長志常叵測朔漠素無痘症自嘉
靖庚戌深入石州染此症犯者輒死達爾罕者布色圖
祖濟農部落也數將命奉貢累官指揮同知一日互市
還與托克托台吉等俱染痘死托克托子阿津款疑吏
醜其父思亂及布色圖西助浩爾齊共擾河西諸部遂
蠢動十九年冬達爾罕子圖們與他部明安互市訖復

臨遣要賞聲犯內地桐與巡撫賈仁元計先出兵襲之
乃令參將張剛自神木遊擊李紹祖自孤山桐率輕騎
自榆林三道並出遇寇力戰大破之斬首四百七十餘
級馘明安而還延綏自濟農納款塞上息肩二十年自
此兵端復開明安子巴延台日思報復寇鈔無已時矣
桐先被劾罷以是役功超授右都督僉書後府二十一
年以總兵官鎮保定二十四年徙延綏明年再徙鎮寧
夏卓哩克圖宰桑入犯逆戰水塘溝俘斬百二十寇益

糾諸部連犯平虜興武桐督諸將馬孔英鄧鳳蕭如蕙
等連破之斬首二百餘級延綏將士亦數搗巢諸部長
懼乞款詞甚哀三十年二鎮撫臣孫維城黃嘉善協謀
撫之乃復貢市論功文臣自內閣以下悉進官桐以先
去職但賚銀幣許復用而已久之卒於家桐自偏裨至
大帥積首功一千八百時服其勇弟松字來清有膽智
勇健絕倫由舍人從軍累功為寧夏守備萬曆二十二
年布色圖掠張春井大入下馬關松偕遊擊史見李經

以二千餘騎邀擊馬蓮井小勝誤入伏中見戰死松經
皆重傷士卒死過半麻貴援軍至松復裹創力戰寇始
敗走時松已進遊擊將軍論功遷延綏參將貴大舉搗
巢松以右軍出清平塞多所斬獲進副總兵尋以本官
改寧夏東路松為將廉尚氣不能容物常因小忿薙髮
為僧部議聽其歸尋起孤山副總兵三十三年擢署都
督僉事代李如樟鎮延綏明年套寇犯安邊懷遠松大破
之改鎮薊州三十六年夏代李成梁鎮遼東十二月敗敵

連山驛約蘇岱者朶顏長安子也狡黠為邊患與從父莽錦潛入薊鎮河流口大掠去復結黃台吉謀犯喜峰口松受總督王象乾指潛搗黃台吉帳以牽薊寇乃從寧遠中左所夜馳至哈流圖掩殺恭圖部落百四十餘級以大捷聞邀重賞副使馬拯謂恭圖內屬不當勦彼且復讐與松相訐松忿邀賞愈急詔予之恭圖果以無罪見勦怒小岱青又數激之乃以五千騎攻臨大勝堡執守將耿尚仁支解之深入小凌河肆焚掠遊擊于

守志遇於山口大敗死千餘人守志亦重創松駐大凌河不敢救遼人多咎松朝議謂松前僅抵錦州邊十里未嘗出塞所殺乃保塞部落悉縛殺之非陣斬松愈忿言撫按諸臣附會馬拯害其奇功自提兵出塞將搗巢以雪前恥而所得止五級士馬多陷大凌河松益慙憤數欲自經盡焚其鎧冑屍伏置一切疆事弗問兵部以聞乃勒松歸里而以王威代之松既廢時多惜其勇然惡其僨事無推轂之者至四十三年河套寇大入令松

以輕騎搗浩爾齊營獲首功二百有奇復叙用逾二年
薊遼多事特設總兵官鎮山海關以松任之四十六年
張承廕戰歿詔松馳援遼陽明年二月楊鎬議四路出
師以撫順最衝令松以六萬兵當之故總兵趙夢麟保
定總兵王宣為佐期三月二日抵二道關會李如栢等
並進松勇而無謀剛愎使氣二十九日夜出撫順關日
馳百餘里抵渾河半渡河流急不能盡渡松醉趣之將
士多溺河中松遂以前鋒進連克二小砦松喜三月朔

乘勢趨薩爾澣谷口時

大清方築城界凡山上役夫萬五千以精騎四百護之
聞松軍至精騎則盡伏谷口以待松軍過將半伏兵尾
擊之追至界凡渡口與築城夫合據山旁吉林崖明日
松引大軍圍崖別遣將營薩爾澣山上松軍攻崖方戰
大清益千人助之已又續遣二旗兵趨界凡以為援而
遣六旗兵攻松別將於薩爾澣山明日六旗兵大戰破
薩爾澣山軍死者相枕藉所遣助吉林崖者自山馳下

擊松軍二旗兵亦直前夾擊松兵大敗松與夢麟宣皆
歿於陣橫屍亘山野流血成渠

大清兵逐北二十里至碩奇珊而還時車營五百尚阻
渾河而松已敗頃之馬林劉綎兩軍亦敗獨李如柏一
軍遁還事聞朝議多咎松輕進天啟初贈少保左都督
世廕千戶立祠賜祭宣亦贈官立祠世廕指揮僉事宣
榆林人夢麟見父寄傳桐子文煥字歲武由廕敘歷延
綏遊擊將軍累進叅將副總兵四十三年擢署都督僉

事寧夏總兵官延綏被寇文煥赴救大破之明年遂代
官秉忠鎮延綏屢敗寇安邊保寧長樂斬首三百有奇
西路浩爾齊布延泰懼相率降沙等數盜邊為文煥所
敗遂納款既而復與濟農明安合駐高家栢林邊要封
王補賞十事文煥襲其營斬首百五十浩爾齊諸部落
攢刀立誓獻罰九九九者部落中罰駝馬牛羊數也
已沙津又伏兵沙溝誘殺都指揮王國安糾孟克什勒
犯雙山堡復犯波羅文煥擊破之追奔二十餘里當是

時套寇號十萬然其衆分四十二枝多者二千少不及千騎屢不得志沙津乃與濟農明安孟克什勒相繼納款延綏遂少事文煥尋以疾歸天啟元年再鎮延綏詔文煥援遼文煥乃遣兵出河套搗巢以致寇諸部大恨深入固原慶陽圍延安揚言必縛文煥掠十餘日始去命解職侯勘奢崇明圍成都總督張我續請令文煥赴救至則圍已解偕諸軍復重慶崇明遁永寧文煥頓不進尋擢總理盡統川貴湖廣軍度不能制賊謝病去

坐延綏失事罪戍邊七年起鎮寧夏寧錦告警詔文煥
馳援俄令分鎮寧遠進右都督調守關門尋引疾去崇
禎元年錄重慶功廕指揮僉事三年陝西羣盜起五鎮
總兵並以勤王行總督楊鶴請令文煥署延鎮事兼督
固原軍數敗賊賊亦日益多會山西總兵王國樑擊王
嘉允於河曲大敗賊入據其城部議設一大將兼統山
陝軍協討乃令文煥為提督偕曹文詒馳至河曲絕饗
道以困之神一元臨寧塞文煥家破遂留文詒令文煥

西還四年御史吳牲劾其殺延川難民冒功給事中張承詔復劾之下獄褫職十五年用總督楊文岳薦以故官討賊無功復謝病歸子弘域天啟初歷延綏副總兵七年夏文煥援遼卽擢總兵官代鎮寧夏積資至右都督崇禎中提督池河浦口二營練兵遏賊南渡頗有功十三年移鎮浙江尋謝病去國變後文煥父子歸原籍

崑山卒

蕭如薰字季馨延安衛人萬曆中由世廕百戶歷官寧

夏參將守平虜城二十年春巴拜劉東暘據寧夏鎮城
返遣其黨四出畧地巴拜子承恩徇玉泉營遊擊傅桓拒
守為其下所執賊已徇中衛及廣武參將熊國臣等棄
城奔列城皆風靡賊黨土文秀徇平虜獨如薰堅守不下
如薰妻楊氏故尚書兆女也賢而有智贊夫死守日具
牛酒犒士巴拜養子雲最驍勇引河套卓哩克圖急攻
如薰伏兵南關佯敗誘賊入射雲死餘衆敗去又襲卓
哩克圖營獲人畜甚多卓哩克圖憤復來攻為麻貴所

却城獲全初帝聞如薰孤城抗賊大喜厚賚銀幣擢官
副總兵六月遂以都督僉事為寧夏總兵統延綏甘肅
固原諸援軍其秋竟與李如松等共平賊再進署都督同
知廕錦衣世指揮僉事妻楊氏亦被旌二十二年八月
布色圖西犯定邊闌入固原塞副將姜直不能禦遂由
沙梁墮牆入直抵下馬關縱橫內地幾一月如薰免官
直下吏尋復以總兵官鎮守固原套寇入犯擊却之青
海寇糾番族犯洮岷如薰及臨洮總兵孫仁禦之禽斬

三百四十有奇撫叛番五千獲駝馬甲伏無算再鎮寧夏伊勒敦達春數入犯輒挫衄去徙鎮薊州久之罷歸再起故官鎮延綏天啟初廷議京軍不足用召邊將分營訓練如薰曲神機營陞見帝賜食加獎勞焉明年出鎮徐州俄召還京復以總兵官鎮守保定五年夏魏忠賢黨劾其與李三才聯姻遂奪職崇禎初卒賜恤如制如薰為將持重更厯七鎮所在見稱自隆慶後款市既成烽燧少警輦下視鎮帥為外府山人雜流乞朝士尺

牘往者無不饜所欲薊鎮戚繼光有能詩名尤好延文士傾貲結納取足軍府如薰亦能詩士趨之若鶩賓座常滿妻楊氏繼妻南氏皆貴家女至脫簪珥供客猶不給軍中患苦之如薰莫能却也一時風會所尚諸邊物力為耗識者歎焉如薰祖漢涼州副總兵都督僉事父文奎京營副將都督同知兄如蘭陝西副總兵都督僉事事前府僉書如蕙寧夏總兵官都督同知如芷提督南京教場都督僉事

達雲涼州衛人勇悍饒智略萬厯中嗣世職指揮僉事擢守備進肅州遊擊將軍綽和爾入犯偕叅將楊濬擊敗之遷西寧叅將永什卜者順義王諳達從子也部衆強盛先授都督同知再進龍虎將軍自以貢市在宣府守臣遇已厚不可逞乃隨諳達西迎活佛留據青海與衛拉特塔布囊歲為西寧患嘗誘殺副將李魁邊臣不能執益有輕中國心二十三年九月九日度將士必燕飲擁勁騎直入南川屬番偵告雲設兵要害令番人繞

出朶爾缺口外潛扼其背而已提精卒二千與戰方合
伏忽起寇首尾不相顧番人夾擊大敗之雲手馘其帥
一人斬首六百八十餘級其走峽外者又為番人所殲
獲駝馬戎器無筭為西陲戰功第一所馘巴圖爾罕即
前殺李魁者其地即魁陣亡處時又皆九月也先是副
將李聯芳為寇所殺總兵尤繼先生獲其讐言邊人以此
二事為快雲既勝度寇必復至厚集以待踰月寇果連
宰桑浩爾齊諸部先圍番敕卜爾寨以誘官軍番不能

友合於寇寇遂逼西川雲督諸軍營康纏溝寇悉衆圍之矢石如雨雲左右衝擊自辰至申戰數十合寇死傷無算乃以長鎗鉤杆專犯西寧軍西寧軍堅不可破寇始遁追奔數十里而還捷聞帝大喜遣官告郊廟宣捷大學士趙志臯以下悉進官雲擢都督同知廕本衛世指揮使寇歲掠諸番番不敵則折而入寇及寇敗遠徙雲急招番復業者七千餘戶永什卜連犯明沙上谷雲並擊走之初南川奏捷雲已進副總兵至是命以總兵

鎮守延綏未幾鎮甘肅二十六年永什卜復犯西寧參
將趙希雲等陣歿雲坐停俸甘寧間有松山必圖阿齊
圖宰桑卓哩克圖等居之屢為兩鎮患巡撫田樂決策
恢復雲偕副將甘州馬應龍涼州姜河永昌王鐵塊等
分道襲之寇遠竄盡拔其巢攘地五百里雲以功進右
都督廕世指揮僉事無何青海寇糾衆分犯河西五道
俱有備獻首功百七十有奇松山既復為築邊垣分屯
置戍錄功進左都督寇戀其故巢乘官軍撤防時潛兵

入犯雲據險邀擊之寇大敗斬首百六十加雲太子少保寇益糾其黨犯鎮番雲及諸將葛敦等大破之斬首三百七十餘級帝為告廟行賞進雲世廕二秩寇復入犯雲破走之時寇失松山走據賀蘭山後連青海諸部寇鈔不已伊勒敦達春尤桀驁三十三年連營犯鎮番雲遣副將柴國柱擊之寇大敗去未幾青海寇復大入將士分道遮擊生禽其長實噉餘敗奔三十五年叙功雲增勲廕是年松山青海二寇復連兵犯涼州雲逆戰

紅崖大獲斬首百三十有奇雲為將先登陷陣所至未
嘗挫衄名震西陲為一時邊將之冠以秋防卒於軍贈
太子太保子奇勛萬厯未為昌平總兵官尤繼先榆林
衛人萬厯中積功為大同副總兵十八年浩爾齊宰桑
犯洮河副總兵李聯芳等戰死詔進署都督僉事充總
兵官代劉承嗣鎮守固原寇據莽刺捏工二川日蠶食
番族且擾西寧聞官軍大集布色圖又敗於水泉乃乘
冰堅渡黃河北走留其黨克伯里總塔爾等五百餘人

牧莽刺川南山南山即石門大山口走烏斯藏門戶也
屬悉來告繼先乃命番以八百人前導與故總兵承嗣
遊擊原進學吳顯等疾馳七百里直抵南山奮擊大破
之斬首百五十有奇生獲十二人而拜巴爾的者克伯
里從子前殺聯芳至是被禽師旋寇尾至撒川見有備
乃夜走他寇犯鎮羌西寧石羊亦俱敗浩爾齊遂徙帳
西海錄功進秩為真增世廕一秩尋以病歸起僉中軍
府事二十一年冬為遼東總兵官綽哈二千騎入韓家

路繼先督諸軍奮擊寇乃去再引疾歸二十四年起鎮
薊州自威繼先鎮守十年諸部雖叛服不常然邊警頗
稀寇嘗一入青山口輒敗去最後長安導班白二部長
入犯道石門闕山海關京東民盡逃入通州繼先出關
寇已縱掠寧前去總督蹇達怒繼先不追擊而繼先方
收召降丁八百人欲倚為用達乃疏言番情難馭恐遺
後夏請調繼先別鎮俾降丁隨往部議以延綏杜松與
易任巡撫劉四科爭之達復疏言守邊在自強繼先獨

言惟藉降丁去歲出關何竟不得降丁力羽書狎至邊
隘虛實久為所窺呼吸變生安所措手兵科宋一韓等
力主達議且劾繼先他事繼先遂罷卒於家繼先眇一
目習兵敢戰時稱獨目將軍

官肅忠榆林衛人萬厯中起世廕官固原參將擢寧
夏甘肅副總兵嘗與主將達雲破寇於紅崖伊勒敦達
春屢被挫去移守薊鎮東協積功加署都督同知四十
年五月擢總兵官代張承廕鎮延綏套寇犯保寧肅忠

督參將杜文煥等敗之白土澗一日再捷俘斬二百五十馘其長十二人無何旗牌撒勒犯長樂秉忠將輕騎追襲之大獲孟克什勒犯保寧秉忠又破之已而孟克什勒挾賞不獲再寇保寧及懷遠秉忠隨所向遮擊先後斬首二百二十有奇克什勒及旗牌復以千餘騎犯波羅遙見保寧軍遂遁去濟農者布色圖子為套中之主士馬雄諸部見布色圖襲順義王補其五年市賞遂挾求封王且還八年市賞邊臣不許則大怨會他部塔

類以痘瘡死忘言邊吏毒殺之而沙津盜邊又被衄去
濟農遂合套中諸部大舉入寇東道高家大柏油神木
柏林中道波羅西道磚井寧塞諸城堡盡被蹂躪副將
孫洪謨禦之大柏油中伏被圍遊擊萬化孚等不救士
卒死傷過半洪謨遂降秉忠聞寇入急遣遊擊張榜潛劫
其營又敗死四百餘人會故帥杜松寧夏帥杜文煥援軍
至竝破敵而秉忠所部亦有斬獲寇始退然猶駐塞下時
鈔掠秉忠亦屢出襲擊多獲首功竟以前負被劾去官方

侯代沙津謀從雙山建安入犯秉忠設伏待之遂大敗去
斬其首二百有奇四十六年與劉綎柴國柱等同被召令
僉書前府尋赴援遼東楊鎬之四路出師也令秉忠防守
鎮城無何辭疾歸久之卒子撫民亦為寧夏總兵官

柴國柱西寧衛人萬厯中由世廕厯西寧守備驍猛善
射從叅將達雲擊寇南川勇冠軍錄功進都指揮僉事
寇盜邊輒為國柱屢挫屢進涼州副總兵松山既復方
建堡置墩寇數來擾國柱擊却之伊勒敦達春連兵寇

鎮番國柱馳救斬首二百有奇獲馬駝甲仗無筭青海
寇大掠鎮羌黑古城諸堡守備楊國珍不能禦國柱率
遊擊王允中等擊走之伊勒敦達春復犯河西國柱邀
擊獲首功百二十擢署都督僉事陝西總兵三十六年
春改鎮甘肅伊勒敦達春屢不得志益寇鈔永昌國柱
馳與大戰敗之追至麻山湖斬首百六十有奇其部落
復入寇守備鄭崇雅等戰歿國柱坐奪俸一年河套松
山諸部長合兵入寇國柱檄諸將分道擊復斬首百六

十屢加右都督世廕指揮僉事久之罷官四十六年夏
召僉書都督府事無何代杜松鎮山海關松敗歿爾敦
圖乘機犯邊國柱等力遏之尋移鎮瀋陽謝病歸天啟
初追錄邊功左都督卒賜恤如制

李懷信大同人由世廕歷都指揮僉事掌山西都司廉
勤數被推薦萬厯中遷延綏中路參將進定邊副總兵
布色圖浩爾齊塔類巴延泰等歲擾邊定邊居延綏西
被患尤棘懷信勇敢有謀寇入輒敗其先後鎮帥杜松

王威張承廕官秉忠又皆一時選故邊患雖劇而士氣不衰四十三年擢甘肅總兵官延人為立生祠松山寇入掠蘆溝墩諸處懷信邀擊大敗之斬首三百有奇獲駝馬甲仗無算已復分三道犯鎮番諸堡懷信亦分遏之寇引還將士尾其後獲首功百九十有奇自後寇入多失利去威名著河西先是陝西止設四鎮自西寧多警增設臨洮總兵官遂為五鎮然惟甘延最當敵衝故擇帥常慎而甘肅北有松山南臨青海諸部落環居其

外尤難禦懷信在鎮遼人恃以無恐四十七年遼東急
詔充援勦總兵馳赴遼東時熊廷弼為經畧令懷信偕
柴國柱賀世賢以四萬人守瀋陽努圖克綽哈謀入犯
廷弼急移懷信戍首山寇不敢入俄泛懿有警檄懷信
禦却之遼事益急諸老将多引避廷弼復負氣凌諸將
懷信不能堪亦堅卧引疾去天啟二年起鎮大同明年
罷已追錄邊功進左都督久之卒於家

贊曰張臣諸人勇畧自奮著效邊陲均一時良將選也

董一元白沙塢墨山之捷奇偉不下王越至承廕與松以將門子捐軀報國視世所稱東李西麻者相去何等也

明史卷二百三十九

欽定四庫全書

明史卷二百三十九考證

董一元傳十五年徙薊州久之劾罷

臣方煒按劾罷

史未詳何事他書亦無可考謹識

董一元傳石曼子為陳璘所殲一元得還故秩

臣方

煒按一元得還故秩言緣陳璘殲石曼子之故未及

一元得陳璘分道並進之故也事詳璘傳謹識

董一元傳

王保附

張邦奇被劾命保與易任

臣方煒

按張邦奇被劾傳未詳何事他書亦無可考謹識

杜桐傳桐先被劾罷以是役功超授右都督僉書後府

臣方煒按桐先被劾罷前文未詳桐被劾本文亦未詳所劾之事他書皆無可考謹識

杜桐傳桐以先去職但賚銀幣許復用而已臣方煒

按桐以先去職但賚銀幣許復用而已考前文桐先被劾罷以功超授右都督僉書後府至此已十年之久此十年中傳內並未載及桐去職事他書亦無可

考謹識

杜桐傳 弟松附 松與夢麟宣皆歿於陣 臣方燁按杜

松於乾隆四十一年蒙

賜諡忠烈謹識

明史卷二百三十九考證